

Hernaniko komertzioa erabat gelditu da, greba orokorrerako deiari erantzunez

Azken egunotako mobilizazioetan Ertzaintzak izandako jarrera salatu dute

Nagore Irastorza / Hernani

Greba orokorrerako deialdiak jasotako erantzuna «oso ona» izan dela adierazi dute *Utzi Hernani bakean* herri ekimeneko kideek. Denden %100ek erantzun diote deialdiari, eta enpresa ugaritan lanuztea egin dute. Eguerdiko manifestazioan 3.000 lagun inguru bildu ziren.

KALEAK hutsik eta denda, taberna eta bestelako guztiak itxita egon ziren atzo egun osoan Hernanin (Gipuzkoa), *Utzi Hernani bakean* herri ekimenak deitutako greba orokorrari erantzunez. Joan den astean Hernanin eta Goizuetan Ertzaintzak 13 lagun atxilotu izana salatze-ko egin zuen deialdia herri ekimenak.

Dendari eta ostalarien %100ek bat egin zuten deialdiarekin, eta enpresa txiki gehienek ere bai. Hainbat enpresa handitan ere lanuztea egin zuten, Hernaniko Udalak bezalaxe. Ikastetxe guztiek ateak itxiak izan zituzten egun osoan.

Herri ekimenak oso ontzat jo ditu deialdia eta egunotan izandako mobilizazioak. «Hernanin aspaldi ez bezalako mobilizazioak antolatze-ko gai izan gara, Ertzaintzak Entzutegiaren laguntzaz emandako kolpe gogorra gaindituz», esan zuten. Gainera, mobilizazioetan Ertzaintzak izandako jarrera salatu zuten, «herritarrak bortizki jipoitu, mehatxatu eta iraindu baitituzte». EAK, aldiz, greba «EHren porrota» izan dela esan zuten.

Eguerdian manifestazio jendetsua egin zen, eta 3.000 lagun inguruk parte hartu zuten. Atxilotuak askatzearen aldeko eta Ertzaintzaren aurkako oihuak entzun ziren bereziki. Manifestazioaren ibilbide osoan Ertzaintzaren presentzia erabatekoa izan zen. Besteak beste, Mertxe Etxeberria herriko alkatea eta Karmele Aierbe HBko Mahai Nazionaleko kidea izan ziren bertan.

Aierbek gogor salatu zuen Ertzaintzaren operazioa, eta Hernaniko herriak emandako erantzuna goraiatu zuen. Bestalde, atxiloteten erantzuleak ere gogoratu zituen. «Batetik, PP eta PSOEn erantzunkizuna gogoratu



PABLO S. QUIZA

Ehunka lagunek parte hartu zuten eguerdian egindako manifestazioan.



PABLO S. QUIZA

Ertzaintzak hurbiletik zaindu zituen kaleak manifestazioan.

nehar da, Euskal Herriaren aurkako presioa egiten jarraitzen dutelako. Bestetik, EAJrena, presioa ikusirik kikildu delako eta zapalkuntzaz baliatu delako, Espainiako Gobernuaren aurrean ondo geratzeko». EAJren jarrerak «atzerapausoa» adierazten duela gehitu zuen: «Aurrera ekinbidez egin behar da, ez errepresioz».

Atxilotuetako bi aske, bermea ordainduta

Eduardo Karrera eta I.G. adin txikikoa aske geratu ziren atzo, senitartekoen hiru

eta lau milioiko bermeak ordaindu ostean. Karreraren askatzea egun batez atzeratu da, bermea dirutan ordaintzeko agindua eman baitzuen Entzutegiak. Atzo arratsean ziren iristekoak Hernanira.

Bestalde, gainontzeko 11 atxilotuak Alcala Mecoko espetxean daude. Euren abokatuak oraindik ez dute ikusteko aukerarik izan. Inkomunikatuta deklaratu zuten, abokatuak ez zuten kredituziorik bisita egiteko. Egunotan sartu berrien modulan egon dira, baina atzo modulu arruntera eramatea espero zen.

EHk Legebiltzarrean agerraldia eskatuko du

Erredakzioa / Donostia

Hernanin eta Goizuetan joan den astean Ertzaintzak egindako operazioa azaltzeko Gasteizko Legebiltzarrean agerraldia eginge eskatuko dute EHko parlamentarioek. EHk dio gertaera larriak izan direla, operazioa «gaztearen ehiza gisa» planteatu baitu Ertzaintzak. «EAJ eta Gasteizko Gobernuaren Espainiako Gobernuaren aldetik jasotzen duten presioa gainera kentzen saiatu dira operazio honekin». Bestalde, Hernanikoa bezalako «propaganda operazioak» bultzatuz, EAJk eta Gasteizko Gobernuak Euskal Herrian abian den prozesuarekin dituzten «konpromisoak alde batera» uzten dituztela dio EHk, «errepresioari babesa emanez». Ertzaintzaren inkomunikazioa ere salatu du EHk bere oharrean, eta «lehenengo errezetak» direla gehitu. Josu Jon Imaz Jaurizaritzako bozeramaileari azalpenak eskatu dizkio, atxilotetak justifikatuz egindako adierazpenengatik.

Lasa eta Zabala sendiek epaia errekurrituko dute, ez duelako GALEko kide zirenik jaso

■ Kondenatuak ere aurkeztuko dute helegitea

Agentziak / Donostia

IÑIGO IRUINEK, Joxean Lasa eta Joxi Zabala senideen abokatuak, kasazio helegitea aurkeztuko du gaur Entzutegi Nazionalean, ondok Auzitegi Gorenean tramitatu dadin. Izan ere, akusazio partikularreko abokatuak akusatuak talde armatuko kide izateagatik eta lesioen delituagatik kondenatzeko eskatu zuen, baina epaiak ez ditu jaso bi delitu horiek.

Bestalde, helegitea aurkeztuko du kondenatuei bahiketagatik jarri zaien zigorraren kontra. Iruinek dio bahiketak hamabost egun baino gehiago iraun zuela, baina epaiak ez du onartzen. Iruinek datu hori garrantzitsua dela uste du, zigorra ere handiagoa izango bailitzateke.

Senideentzako kalteordaina handitzeko ere eskatuko du Lasa eta Zabala familien abokatuak helegitean, ez baitu uste nahikoa direnik.

Enrique Rodriguez Galindok atzo aurkeztu zuen kasazio helegitea Entzutegi Nazionalean, eta gaur gauza bera egingo dute Angel Vaquerok eta Enrique Doradok ere. Bestalde, Estatuaren abokatuak Estatua *Lasa-Zabala kasuan* kondenatutakoen ordeko erantzule zibila izendatu izana errekurrituko du.

HBko nazioarteko taldeari buruzko ikerketa Gorenak hartzearen kontra azaldu da fiskala

Agentziak / Madril

AUZITEGI GORENEKO Fiskaltza HBko nazioarteko taldeari buruzko ikerketa Entzutegi Nazionalak eramatearen alde azaldu da, kasua daraman Baltasar Garzon epaileak egindako galderari erantzunez. Izan ere, Garzonek Esther Agirre legebiltzarkidea sartu du sumario horretan, eta hura foruduna denez kasua Gorenak eramateko eskatu du.